

賢愚因緣經

卷十

四百廿八
樹爵二

50978



元祿九年丙子二月日重脩

皇圖聖圖 帝階綴昌

佛日增輝 懋輪常轉

山城州天安寺法金剛院置



25

賢愚因緣經卷第十

元魏沙門慧覺在高昌郡譯

摩訶令奴品四十八

如是我聞一時佛在迦維羅衛國尼拘盧陀
僧伽藍佛初還國於時諸釋觀佛威儀相好
殊異身體金色三十二相視之無厭各共羣

聚街陌市里異口同音歎說如來於此衆中

無有儔類實可敬哉時諸比丘聞是論已並

共白佛說其諸人歎詠之詞於時世尊告諸

比丘汝等當知吾乃往昔於此衆中最尊最

妙不但今日時諸比丘各共白佛不審世尊

過去世時於此衆中最尊最妙其事云何尔



時世尊告諸比丘諦聽諦聽善著心中吾當
爲汝具足解釋過去世事對曰唯然願樂欲
聞佛便爲說過去無量不可思議阿僧祇劫
此閻浮提有大國王名曰令奴其王統領八
方四千諸小國王一萬大臣五百太子夫人
姝女合有二萬最大夫人字提婆跋提最後
懷妊生一太子其兒端正身紫金色其髮紺
青兩手掌中千輻輪相其左足底有馬形相
其右足底有白象相其兒福德人中竒尊即
依父母而爲立字提婆令奴乳哺長大令奴大王
卒遇時病其命將終諸小國王羣臣太子咸
來問病因問大王假其終沒諸王太子誰應

紹嗣時王報曰若我諸子有能具足十功德者乃立爲王何等十德一者身紫金色其髮紺青二者兩手掌中有金輪相具足不缺三者其右足底有白象相四者其左足下有馬形相五者著王衣服與身相可不大不小六者坐王御座威德巍巍其坐安隱七者諸王群臣歡喜敬禮稱善無量入於後宮夫大姬女踊躍歡喜作禮恭敬八者若將至於天祠泥天木像悉爲作禮九者福德威力能雨七寶稱給一切十者其母是誰提婆跋提夫人所生若有具足是十功德斯乃立之用作大王教勅已竟無常對至遂便命終諸王臣民

五百子中從其大者次以十事觀相其身此諸太子身無金色髮無紺青手掌無輪足底無有象馬之相著王者服不相當坐于御座其木師子驚張起立欲搏啣之諸王臣民悉不敬禮將至宮內夫人媿女悉不歡喜無禮敬者設入天祠自禮天像諸餘泥木天像悉不作禮語使雨寶亦復不能又復不是提婆跋提夫人所生乃至五百諸大太子於十事

中乃無一事最下小子身紫色其髮紺青看其兩手輪相具足觀其脚底象形馬相炳然如畫著王法服與身相可坐於御座福德巍巍諸王臣民無不敬禮入於後宮夫人媿

女敬奉作禮將至天祠泥木天像悉皆爲禮
教使雨寶始語即雨問是誰生提婆跋提夫
人所生十事具足諸王臣民即拜爲王至十
五日日初出時有金輪寶從東方來輪有千
輻縱廣一由旬王即下座右膝著地跪而言
曰若我福德應爲王者輪當稱我即如其言
來在殿前住虛空中白象寶者從香山來毛
尾貫珠若王乘上象皆能飛從朝至午遍四
天下若以足行足所觸地即成金沙紺馬寶
者身紺青色其馬毛尾皆悉珠色皆雨七寶
若王乘上一食之頃遊四天下不疲不勞神
珠寶者自然而至其珠光明晝夜恒照百二

十里內復能雨於七寶稱給一切玉女寶者自然而至端正殊妙稱適王意典藏臣者王須七寶隨意給足終無乏盡其典兵臣王若欲湏四種兵時願視之頃諸兵悉集行陣嚴整威力非凡七寶既具坐自思惟吾享斯位皆由前身宿種福業乃致之耳今當紹繼使不斷絕即以香湯洗浴其身著新淨衣手執香爐向于東方跪而言曰東方使士來受我請即時便有二万辟支佛來至王宮南西北方悉皆請之時有六万辟支佛來受王請王與諸臣四事供養其八万四千諸小國王離家來久即啓大王欲辭還國王即聽之因啓

王曰此中使士其數甚衆願王垂愍減省少許與臣供養願使將來共享斯福於時大王即以四万辟支佛與諸小王隨時供養經八万四千歲諸王臣民命終之後皆得生天佛告諸比丘欲知尔時令奴王者今現我父白淨王是尔時提婆跋提夫人者今現我母摩訶摩耶是尔時提婆令奴王者今我身是尔時五百太子者今此五百釋是我乃尔時於諸人中最爲尊妙吾今成佛衆相具足於此衆中最爲奇妙時諸大會聞佛所說有得須陀洹者斯陀含阿那含阿羅漢者有種辟支佛因緣者有發菩薩心成不退者衆坐歡喜

頂戴奉行

善求惡求品四十九

如是我聞一時佛在舍衛國祇樹給孤獨園
亦時提婆達多雖復出家利養蔽心作三逆
罪推山壓佛傷佛脚指復縱放黑象欲令害
佛別僧兩部殺漏盡比丘尼以故殺生疑畏

賢思因緣卷十

受後報時有六師即往問之六師便為說諸
邪見言為惡無罪為善無福信敬心生喪斷
善根是時阿難析體愛重惋恨情深悲哽懊
惱白世尊言調達愚癡造不善業壞破善根
辱釋種子亦時世尊告阿難言提婆達多非
但今世為利養故斷破善根過去世時亦貪

利養喪身失命阿難白佛言世尊提婆達多
過去世時貪利喪身其事云何願樂欲聞佛
告阿難善聽當說往昔無量不可思議阿僧
祇劫此閻浮提有國名波羅捺時有薩薄名
摩訶夜移其婦懷妊自然仁善意性柔和月
滿生男形體端正父母愛念施設美饍延請
親戚并諸相師共相娛樂抱兒示衆爲其立
字相師問言此兒受胎已來有何瑞應其父
答言受胎已來其婦自然慈心和善相師即
爲立字名爲善求乳哺長大好積諸德慈愍
衆生次後懷妊自然弊惡期滿生男形體醜
陋即請相師爲其立字相師問言此兒懷妊

有何感應答言懷兒已來受性弊惡於時相
師即爲立字名曰惡求乳哺長大好爲惡事
恒生貪心懷嫉妬意年各長大欲行共佔入
海求索寶物各有五百侍從前後而發途路
懸遠中道乏糧經於七日去死不遠是時善
求及諸賈人咸共誠心禱諸神祇欲濟飢儉
於空澤中遙見一樹枝葉鬱茂便即趣之有
一泉水善求及衆悉共誠心求哀救護誠感
神應現身語之斫去一枝所湏當出諸人歡
喜便斫一枝美飲流出斫第二枝種種食出
百味具足咸共承接各得飽滿斫第三枝出
諸妙衣種種備具斫第四枝種種寶物悉皆

具足莊嚴悉備所須盡辦惡求後到衆人如
前盡得充足便自念言今此樹枝能出如是
種種好物況復其根今當伐之足得極妙佳
好之物思惟心定令人伐之是時善求聞如
是語懷憤懊惱語惡求言我等飢乏命在且
夕蒙此樹恩得濟餘命云何懷此弊惡心
而欲伐之尔時惡求不用其言即掘其根善
求感佩不忍見之領衆歸家伐樹已竟有五
百羅刹取此惡求及衆賈人悉皆噉之財物
伴侶一切喪失佛告阿難尔時善求者今我
身是尔時父者今現我父淨飯王是尔時母
者今現我母摩訶摩耶是也時惡求者今提婆達

多是阿難提婆達多非但今日作不善事貪
利養故世世常造我於往昔常與相值恒教
善法而不用之反更以我爲怨尔時阿難及
四部衆聞佛所說悲喜交集咸自勸勵頂戴
奉行

善事太子入海品五十一

如是我聞一時佛在羅閱祇耆闍崛山中與
大比丘僧圍遶說法尔時賢者阿難見提婆
達多於如來所常懷嫉妬驅飲醉象推山鎮
佛種種方便欲得危害然佛慈心常有矜愍
於羅睺羅及提婆達多視之一等無有差別賢
者阿難覩其如是常懷惋悵思惟在意從座而

起偏袒右肩長跪合掌歎說是事佛告阿難
提婆達多不但今日興惡於我宿世之時亦
傷害我然我於彼常慈念之賢者阿難即白
佛言不審世尊提婆達多亦為傷害今時慈
愍其事云何願具說示佛告阿難過去久遠
無量無數不可思議阿僧祇劫此閻浮提有

佛

摩訶目犍連

六

一國王名曰勒那跋蘇

晉言寶鑑

領五百小

國王有五百夫人嫁女皆無有子王便禱祠
諸天日月山海樹神經年歷紀不獲子息王
大愁憂而自念言我今無子旦夕崩亡國無
紹繼天下必亂所以者何五百諸臣不相賓
伏便當力諍強弱相陵枉殺無辜亡國喪民

莫不由此念是事已益增憤惱時有天神知
王至意於王夢中而語王言城外林中有二
仙士其第一仙身有金色福德聰辯不可逮
及汝苟須子可往求請必當迴意來生王家
王尋驚悟差有喜色即勅駕乘單將數人遍
往推覓便得見之即向求哀種種自說國無
繼嗣憂深慮重貪屈大仙來生我家紹繼國
嗣去我憂患若不見耻唯垂降願尔時仙人
見王懇懃不忍拒逆即便可之第二仙人復
語王言我亦當往生於王家王大歡喜便辭
還宮經歷數時金色仙人即取命終大王夫
人名曰蘇摩即覺有身聰明女人能得此智

知所懷妊分別男女便自說言我所懷妊必當是男王及宮內聞此語已欣悅無量王勅宮內夫人嫁女盡共承給稱悅其意牀蓐飲食極令細軟將護進止不臨危險十月已滿其大夫人便生男兒端正絕異身紫金色其髮紺青人相具足王及內外觀之無狀因召相師令占相之相師尋詣上下觀相歡喜踊躍而白王言此兒相好人中難有聰明福德不可逮及王聞遂喜復告相師可爲立字相師問王今此太子受胎已來有何變異王即荅言此太子母素來妬惡樂人之過妄舉姦非見他人善心不爲喜懷妊已來志性改異

爲人慈仁矜愚愛智好修施惠等意護養相
師聞此讚言善哉此是兒志寄情於母便爲
立字名迦良那伽梨

晉言善事

其第二夫人

名曰弗巴第二仙人亦復命終生於第二夫
人腹中日月足滿便生男兒形體狀貌無他
殊異復召相師次令相師而瞻相之相師披
觀而語之言此太子者是常入耳福德智能
爲足自任王復勅之爲其立字相師復言有
何異事王語相師此太子母素性忠良爲人
慈順樂宜人善懷妊已來反更樂惡嫉妬賢
能見善不喜相師復言此亦兒志寄之於母
故使然耳因即立字爲波婆伽梨

晉言惡事

其王介時注心愛念迦良那伽梨不失其意
即勅爲起三時之殿冬時居溫殿春秋居中
殿夏時居涼殿安置伎直而娛樂之太子漸
大聰辯殊異學諸世典十八部經誦持通利
并善其義後辭出遊王即聽之勅治道陌除
去不淨乘大白象金銀校飾千乘萬騎導從
前後街道陌中一切人民夾道兩邊諸樓閣
上觀者無數皆言太子孰似梵天威相姿貌
人中希有介時太子見諸乞兒身體羸瘦衣
被弊壞左捉破器右持折杖卑言求哀從人
乞匄太子問曰何以乃介羣臣荅言如此人
輩或無父母孤窮單獨無所依仰癡疾狂病

不能作役無一錢儲身口所切是使尔耳太子慈愍心深增悼轉復前行見諸屠兒殺害畜生稍割稱賣太子問言何以作此尋各荅言我不必樂祖父已來以此爲業若捨此事無以自濟太子聞此長歎而去轉前到田見諸耕者墾地出蝦蟇拾吞復見有蚰蝓吞食蝦蟇孔雀飛來啄食其蚰蝓太子問人此作何等耕者荅言此是我業於中下種後當得穀以自供食并輸王家太子歎曰人由飲食殺害衆生役身役力辛苦乃尔轉復前行見諸獵師趣向羣鳥挽弓欲射復見安網張施在地見諸禽獸墮在其中驚張鳴吼不能得脫

太子問言皆作何等咸皆荅言捕諸禽獸以
自供濟太子聞此深歎捨去到河池邊見捕
魚師張網捕魚狼藉在地跳踉伸縮死者無
數太子復問皆各荅言我仰此魚用供衣食
太子長歎愍哀羣生為衣食故乃當如是教
害衆生供俟身口殃罪日資後報如何便迴
還宮憂念不樂往白父王願賜一願王荅之
曰恣汝所欲不相違逆太子白王出行遊觀
覩彼羣品為衣食故欺誑殺害積罪日增意
甚悼愍欲得供濟願王聽我用於王蔽自恣
布施充民所乏王於太子倍加愛念聞其所
語不能違意即便可之於是太子即時宣下

告諸人民迦良伽梨太子布施窮困乏短之者一切施給皆悉來取若有欲湏金銀寶物衣服飲食及餘所湏當施與之即開王藏出諸寶物著諸城門及置市中隨人所湏一切悉給尔時諸國沙門婆羅門貧窮孤老癯殘疾病強弱相扶次第而至湏衣與衣湏食與食金銀寶物恣意而與尔時人民展轉相語遍閭浮提皆悉來集用王寶藏三分向二時典藏臣入白王言大王典領五百小國諸國使命當有往反事須寶物還相報遺太子布施用王內藏三分之物向用其二王可思之勿令後悔王聞是語而告臣言我此太子意

好布施其心猛盛不可迴轉若當禁遮儻違其意令其憂惱當去何耶分恣其意莫得違失如是數時太子布施所殘藏物三分用二臣復白王前所殘物日日布施三分之中已更用二餘殘少許當俟信遺不可盡用願王熟思後莫見咎王便思惟而告臣曰吾愛此子特復倍餘不忍顯露違逆其意若來索寶小避行來若其急索且復與之乍得乍否可延日月介時藏臣得王教已太子後日來索寶時其臣託緣餘處行來或時索得或時不得不能一一稱其所湏太子覺之而自念言今此藏臣有何力能敢違失我不相承用將是

王意故使尔耳又人子禮不應竭用父母庫
藏令其盡也今此歲中所殘無幾我當去何
得於財寶給施一切令無有盡作是念已即
問諸人今此世間作何事業可得多財稱意
足用有一人言不避劇難遠出販賣可得多
財有一人言墾治田畝不避寒暑廣種五穀可
得多財有一人言多養六畜隨時將護時節
蕃息可得多財或一人言唯不顧命能入大
海至龍王宮求如意珠斯事成辦最得多財
於時太子聞衆人語而自念言行佔種田畜
養六畜且非我宜得利無幾唯入大海詣龍
王宮此入我意當勤求是事作是念已往白

父王我欲入海求索珍寶給施衆生用之無
盡唯願父母當見聽許王及夫人聞太子言
甚懷憂忬問太子曰汝有何意而欲入海苟
欲布施成汝本志我家所有藏內餘殘盡當
與汝以用布施何爲自棄去欲入海又聞海
中多諸劇難黑風羅刹水浪迴波摩竭大魚

水色之山如斯衆難安全者少百伴共往時
有一還汝今何急沒身危險我及汝母無不
極憂諸王臣民皆懷忬惕之懼念捨此意勿
更紛紜於是太子聞王此語心存大計志期
拔濟王雖留遮意不傾動規盡身命成辦其
事布身于地腹拍王前因白王言唯願垂哀

遂子本心若必拒逆不見聽許伏身此地終
不起也王及夫人內外一切見太子意不可
迴轉自誓畢死伏身于地皆共解諭曉謝令
起其言如初執志不變從一日至二日乃至
六日王及夫人自共議言太子不食已經六
日到明七日命必不全此見前後意所欲作
要必成辦不可迴轉若令入海猶有還理今
違其意交斷人望就當聽之故憂在後王與
夫人相可已訖俱共來前各捉一手涕淚交
流因語之言聽汝入海可起還食於時太子
聞王語已歡喜而起曉諭父母我雖入海不
以當還唯願莫大憂念於我為辦種種餽饍

飲食已訖出外廣行宣令迦良那伽梨今欲
入海誰欲往者當共俱進爾時國中有五百
賈客咸皆來集悉言欲去是時國中有盲導
師自前已曾數反入海太子聞之即往到邊
向其慇懃嘉言求曉汝當與我共入大海示
我行來利害去就導師答言我既年老又盲
無見雖欲自力私情甚難王愛太子隆倍異
常須臾離目有懷悵逢今聞與我共入大海
儻復見拒各我不少於時太子聞是語已即
便還宮自白父王今此國中有盲導師前已
數反曾到大海願王勅曉令共我去王聞是
語自往其所語導師言我此太子志存入海

種種諫語意志不迴事不得已今就聽去念其年少未厭辛苦聞汝曾行知海去就望汝迴意忍勞共往介時導師聞王是語即白王言恨我年老盲無所見大王所勅豈敢有違王得是語即自還宮于時太子即共導師論定發日還到王所王問左右誰敬愛我可與太子共往採寶波伽梨即白王言願與兄俱共涉大海王聞此語而自念言令弟共往險厄之中儻能濟要勝於他人作是念已即可聽去介時太子出三千兩金以千兩辦糧千兩辦船復以千兩供諸所須嚴辦已訖於是欲發王及夫人諸王臣民啼哭送之別於路

次於是太子與諸同伴進道而去到於海邊
牢治其船令有七重候風時節推著水中以
七大索繫於海邊搖鈴唱令語衆人言汝等
皆聽海中衆難水浪迴波惡龍羅刹黑風迴
覆海色之山摩竭大魚如是餘難其數猶多
前後入海吉還者少若狐疑者於此可還誰
能堅意分捨身命不願父母不戀妻子當共
入海至於寶所若得珍寶安隱還歸子孫七
世用不可盡作是念已便斷一索日日如是
至於七日唱令已訖斷第七索望風舉帆船
疾如箭徑與諸人到彼寶渚太子聰明通達
世典識寶色相悉知其價示諸衆人諸寶好

醜勅語衆賈令隨意取重告衆賈令多少得
中多取船重有沉沒之憂少取行勞不補其
苦勅誠已訖獨與導師別乘小船與衆人別
轉復前進導師問言此前應有白色之山汝
爲見不太子言見導師語言此是銀山轉復
前行導師復問當有紺色之山汝見未耶太子
答言我已見之導師語言是紺琉璃轉更前
進復問太子此中應有黃色之山汝爲見未
太子言見導師語之此是金山到金山下坐
金沙上導師言曰我今羸劣命必不濟即示
方面進止道路汝從是去前當有城極妙七
寶雜廁汝到城門城門若閉其城門邊有金

剛杵汝便取杵以撞其門城中當有五百天
女各賣寶珠來用奉汝更有一女最特尊勝
所持寶珠而有紺色名旃陀摩尼此如意珠
得便堅持勿令失脫其餘與者亦得取之攝
錄諸根勿復與語我今轉極餘命少少若命
終後念識我恩對我發哀埋此沙中導師語
竟氣絕命終對之悲慟爲之葬埋隨其所教
進前而去到七寶城城門堅閉見金剛杵在
其門邊如語取杵以撞其門城門便開五百
天女各持寶珠來奉太子最前一女手所持
珠如語紺色隨次第攝取裏在衣角便旋還
來前太子別後波婆伽梨復語衆人行來不

易但當多取衆人貪寶取之過度太子還到
其舩已滿放舩還來舩便沉沒諸賈人輩乍
沉乍浮太子已有如意珠故身不沒溺波婆
迦梨遙喚太子當見救濟勿便捐棄太子聞
語即牽共浮力勵相挽便得出海出海之後
弟語兄言我曹兄弟辭父母來入於大海望
不空歸際遇不諧喪失財寶單身空到甚可
耻也迦良那伽梨天性忠直即語弟言我故
得寶弟語兄言當用見示即解衣裹以珠示
之弟得見珠因而懷情念我父王恩慈不普
偏愛我兄我不在意今我二人俱來入海兄
得異寶我獨空歸從是已後當遂賤我我當

云何因其卧寐除殺其兄取其珠寶歸語父
王言其兄沒海於是乃當冀愛念我作是念
已密自懷計語其兄言人村漸近我曹兄弟
不應俱眠宜更坐守護持寶珠兄即然之常
共更守波婆伽梨次應休息卧地經時極過
常度然後乃起兄復次卧由坐久故睡寐極
著波婆伽梨起入林中林中有樹其刺極利
即取兩枚各長尺五持來兄邊兄眠甚重一
手捉一當其眼宥刺令沒刺收寶而去太子
苦痛高聲急喚波婆伽梨波婆伽梨此中
有賊喚經數反無有應者尔時樹神語太子
波婆伽梨是汝之賊刺汝眼竟持汝珠去於

時太子宛轉辛苦匍匐而行漸小前進到梨
陀國至於澤宕值五百牛來到其邊有一牛
王見於太子憐敬慊懷出舌舐之餘牛悉集
愕住共視時牧牛人來前試看乃覩太子卧
在于地見其眼中有是長刺觀其形相又知
非凡即爲拔刺將至住處常以酥乳著其瘡
中飲食供給隨時瞻養復經數時眼瘡漸瘥
主人承事未曾懈廢尔時太子問牧牛人汝
居此中有何基業牧牛人荅我在此中無有
基業唯仰乳酪賣用自濟太子自念我遭困
厄勞煩主人恒供養我今者瘡瘥小能行來
當更方宜求易處所念是事已因語主人尔

所時節共相勞煩感念主人恩難酬報我欲
前行到於城中展轉行乞以自供活時牧牛
舍主聞太子言懼其舍內妻子奴婢有餘馱
辭聞太子耳若其不念何緣乃辭作是念已
先問舍內汝曹有何不稱之事而令貴客辭
欲索去舍內皆言我曹於此如兄如弟不知
何緣欲相捨去於時舍主語太子言我相承
待未有不稱不可捨我轉行餘乞於時太子
聞舍主語見其慙懃恒護其意且小停住復
經數時便語主人汝供待我隨時無乏家內
一切接我隆厚但我意中自欲轉行到前城
中望遣一人將我共往時牧牛人見其慙懃

恐違其意令其心愁躬自將護共至城中已
到彼城共別當還太子語言汝哀我者買索
一琴與我自娛時牧牛人尋買琴與共相辭
謝於是別去尔時太子素多伎能歌頌文辭
極善巧妙即於陌容激聲歌頌彈琴以和音
甚清雅城中人民聞其音者皆樂聽觀無有
厭足各持飲食競來與之時城中有五百乞
兒皆來依附賴其飽食梨師跋王有一園監
爲王監守菓柰之園柰有熟者鸚鵡來食手
力不周不能驚遮於時園監擔柰與王其中
好柰鸚鵡啄壞王見瞋恚欲加刑罰園監惶
怖白王自陳家乏人力故使尔耳唯見寬恕

原恕刑罰當索守人更不令介王便恕置不
問其罪園監得脫行求索人見迦良那伽梨
囚於道邊觀其形相似是忠人即語之曰汝
能爲我看守園不汝若能者當供所乏太子
荅言我眼無見去何看守園監語言汝苟欲
看雖復無眼當作方便多作細繩繫諸樹端
以諸鈴物連繫相著展轉相牽汝捉一頭若
聞有聲汝便頓繩鸚鵡驚怖無緣得住太子
聞語而荅之言若有此事我能爲之共相可
竟即往爲守時波婆迦梨到父王國王怪獨
來即問消息波婆迦梨而語王言我曹不偶
船重沉沒迦良那伽梨并諸賈人合諸珍寶

盡沒大海我力勵浮趣得全濟王及夫人聞
是語已絕悶良久無所覺識以水灑面困乃
還蘇宮閣內外諸王臣民間此事者莫不悲
悼王及夫人語波婆迦梨太子沒海汝何以
來何不并就死大海中合土臣民無不痛惜
朝夕哭戀如喪父母太子在宮常愛一鴈王
告其鴈太子養汝今沒大海淹沒不還何不
往看知其所在因作書音以繫鴈頸鴈即高
翔廣行求覓遊彼園上識其歌聲即下試看
得見太子鳴聲悲喜不能自勝太子聞識即
解取書眼無所見不能看讀因求筆紙作書與
王說波婆迦梨刺眼委曲所更歷處辛酸諸

事繫於鴈頸鴈便飛去梨師跋王時有一女
端正殊妙世間希有王甚愛重不違其意時
女辭王出遊園觀王便聽去女至園中見於
太子迦良那伽梨頭乱面垢目無所見著弊
壞衣坐林樹間其女觀察覩其色狀心情屬
向不離其側便坐其邊與共談語食時已到
王遣人喚女還遣人白於王曰願送食來欲
就此食即送食來女語太子我欲共汝一處
坐食太子答言我是乞食之人汝是王女云
何共食若王聞者罪我不少其女慇懃語太
子言若汝不肯我便不食如是數反逼迫不
已而便共食言遂款篤意漸附近目無去離

日轉欲暮王遣人喚女女還遣人往白王曰
我願爲此守園人婦不用其餘國王太子今
我專心慇懃如是唯願父王勿違我意使到
王所具道其事王聞是已不能違情因自言
曰此事災異是女不肖乃至若是寶鎧大王
第一太子迦良那伽梨來求索之今此太子

檀

月

一

入海未還乃欲爲是乞兒作婦辱人名字甚
爲不少我當覆頭蔽著何處作是語已復遣
人喚女言如初執志不移時王愛念不能違
意就并將來著於宮中便令交會成爲夫婦
復經數日婦恒晝去冥乃來還夫怪問之汝
言與我共爲夫婦晨去暮還心不在此將爲

他志故使尔耶婦因自誓我今一心共相尊
奉無有他意大如毛髮若當實尔至誠不虛
令汝一日平完如故言誓已訖一日尋復如
是已後復問太子汝之父母爲在何國太子
語婦汝聞大王勒那跋弥名字不耶荅言聞
之是我父也彼王太子迦良那伽梨汝復聞
不荅言聞之我身是也婦即驚問汝復何爲
辛苦如是太子因爲說其本末婦聞是語復
懷歎息語太子言波婆伽梨懷害於汝自古
至今未有此處汝若得彼當云何治荅言波
婆伽梨雖害於我我於其邊永無瞋恨婦復
語言此事難信相困如是奈何不瞋迦良那

伽梨因自誓言若我於彼波婆伽梨無有微恨
大如毛髮我言至誠不虛欺者當令一目復
得平復自誓已訖眼悉明淨婦見其夫兩目
完淨端正威相未曾所覩喜不自勝往白其
父寶鎧太子迦良那伽梨父王識不王荅言
識女即言曰今欲見不王言今在何處女言
我夫則是其人王笑之曰此女癡狂志亂失
性迦良那伽梨大海未還見盲乞見名之爲
是女復白言願王往看王尋往視審是太子
衣毛悚然愧懼交懷腹拍其前向懺悔言實
不相知願恕其過密將太子還著界上便唱
露言大王太子迦良那伽梨從大海還施設

辦具嚴駕象馬躬與羣臣自往迎之還來到
國廣作賓衆莊校其女方云始欲以女爲配
尔時鴈還擔書到國大王見鴈披解看讀始
得消息知太子存具其所更辛酸諸事王及
夫人乍悲乍喜宮閣内外靡不悲悼懊惱瞋
責取波婆迦梨枷鎖其身幽閉在獄勅令告
下梨師跋王太子辛苦在於汝國云何默住
不來表示書到其時象馬侍送事若有違吾
當自往使便賣書徑到其國梨師跋王奉受
披讀於是太子語梨師跋王牧牛之人於我
有恩我今思念欲得見之可遣使往爲我喚
之王尋召來太子語王我眼被刺正仰此人

供給將養如我父母王若見念當爲我報王大歡喜即時賜遺名衣上服象馬車乘園田舍宅金銀寶物奴婢僕使并所典牛盡持與之其人歡喜非其所望便得安樂終身富貴即還報使因表事情太子在此實所不知辛酸諸事伏想委曲太子今者已還得眼即娉鄙女爲太子妻比嚴辦具臣自衛送尋勅嚴具五百白象金銀校飾極令殊妙選五百人奉侍太子復令擇取五百侍女極最端正才能巧妙種種寶物而莊嚴之五百乘車寶物莊校亦令極妙以送其女梨師跋王白與羣臣數百千乘亦共侍送伎樂歌頌圍遶前後

稱慶無量進道還國。爾時其使到大王所披
讀書表甚增喜踊。告下諸王悉皆來集。即嚴
象馬羣。臣百官夫人。嫫女導從。前後躬迎。太
子到於界。宿。爾時太子遙見父王。下車步進
頭面禮拜。問訊父母。父母亦下。更共抱持。別
久。念想與汝相見。一悲一喜。諸王臣民見其
如是欣感之情。不可具說。談語粗訖。即還駕
乘椎。鍾鳴鼓作。衆伎樂歡喜稱善。導從趣城
到城門外。太子白王。波婆伽梨。今何所在。王
荅之言。如斯惡人。天下不覆。吾不忍見。先來
幽閉在於獄中。太子白王。今當還放。王荅之
言。其罪深重。未及檢校。云何當出。太子復言。

若不放出波婆伽梨終不入城王即勅放語
令來出旣得脫出來見太子太子抱持慰撫
其意然後尔乃入城至宮尔時父母諸王臣
民男女大小見於太子視於怨家如視赤子
波婆伽梨雖刺其眼無有微恨大如毛髮敬
愛慈惻倍加於前一切大眾皆共歎美甚爲
竒特天上人中實無有此太子到宮與波婆
伽梨親款之情慈愛如舊徐問其珠今在何
處波婆伽梨荅太子言來時藏著道邊土中
勅還往取求覓不得太子共往到便見之收
拾珠寶還共歸宮以五百寶珠遺與諸王各
令取一殘如意珠而自留之手捉其珠便從

求願若實當是如意珠者令我父母所坐之處有七寶座頂上當有七寶大蓋其言已訖如語而成復捉其珠而從求願令我父母宮內諸藏及諸王臣所有諸藏前所用施悉令還滿即時捉珠四向歷訖一切諸藏而皆還滿復勅諸臣告下諸國迦良那伽梨太子却彼七日當雨七寶即時告下悉皆聞知於時太子香湯洗浴豎立大幢以珠著頭著新淨衣手執香爐向四方禮口自說言若其實是如意珠者便當普雨一切所須求願已訖四方雲霧即有風來吹除糞穢及餘不淨悉自除去次復雨水用掩塵土次復雨於百味飲

食種種美味次雨五穀次雨衣服次雨七寶
積滿天下今時人民稱慶無量視諸珍寶猶
如瓦石於時太子廣布宣令汝等已得一切
所須供身之事無所乏少若能感謝如是之
恩當攝身口意修十善道今時一切閻浮提
內感念太子無極之施又聞其令剋勵其心
奉行十善不犯衆惡命終之後皆得坐天
佛告阿難欲知今時迦良那伽梨太子者今
我身是今時我父勒那跋弥今現我父淨飯
王是今時母者今現我母摩訶摩耶是時梨
師跋王摩訶迦葉是今時妻者今瞿夷是今
時彼婆伽梨者今提婆達多是閻浮提人蒙

我恩者我初得道八万諸天及我弟子得受
記者如此等是阿難我於尔時為彼所害卒
苦極理猶以慈心而矜愛之况我今日得成
佛道煩惱都除慈悲廣布被彼少害豈不慈
愍佛說是已時諸會者聞佛所說感念世尊
為於羣生經涉劇苦而不退廢歎未曾有悲
喜交懷剋心廣志思惟妙法有得須陀洹斯
陀含阿那含阿羅漢者有種辟支佛善根者
有發無上正真道意者咸共敬戴歡喜奉行

賢愚因緣經卷第十

懣

儔

反直
流

紺青

反古
暗

輻

福音

乳哺

步下
音

搏齒

博上
音下

五結反又蔽反必祭拊先擊恹反烏貫悲哽下反古

膳餽二同時掘反求勿佩蒲妹矜愍上居鎧愛苦

改反又苦憤反古妹拒逆二字音拂巴麻下必羸垂力

反儲除音悼盜音懇墾蝦墓霞麻二字音啄卓跳跟正上

音條下伸縮六反所蕃音煩息怵正音酌惕他反的

紛紜字二音分筍肴二同戶徑反古定渚反之呂杵

尺呂撞直江直悲慟下音洞諧反戶皆臥寐二下

反宥徒浪反高昌人言匍匐上音蒲下慄懷上

恨也反酪音激聲擊上音淹沒益反一翔音酸蘇官

不肖下音兒完二同戶悚然上息勇靡反苗彼

聘反疋併鄙反碑美粗反才古惻反楚側驚也

反

